



眞繫

ル 5
3254
39



凡 5
3254
39


紅 垂

紅 垂

圖 紅

頁六十二之二

昭和十七年
六月三十日
藏本



西

瀾滄衛河


鹽井衛河

建昌衛河

建昌衛

黎溪站

松平關



元謀縣

金沙江渡口過江

白馬口

武定地方

祿勸地方

過江陸路四十里至姜驛
四川黎溪地方


普隆地方


四川通安州

唐翅管木灘

會理州

會理地方





師範曰地理志無志旅途者色願二先生始有之錄之上冊
 凡郵舍之遠近跋涉之險夷可按籍而稽矣此冊首攷水道
 附以各家之遺文知鑿山起剝原非謬說樊綽雲南記以古
 較今不大相悖故次之至近邊關隘入緬程途又留心防禦
 者所不可忽也終以方輿紀要詳于東而西南北則闕焉古
 聖王守在四夷然則閉關絕貢或亦制外之一法歟覽之者
 試繹之丁卯小暑前二日

滇繫書目

趙州師 範荔屏纂輯

旅途二冊下

金沙江圖

顧炎武利病全書金沙江考

張機南金沙江源流考

齊召南水道提綱

升菴集辯瀘水

楊士雲議開金沙江書

滇繫

十一之二

旅途目錄

毛鳳韶疏通邊方河道議

顧氏辯黑水

徐宏祖湖江紀源

史秉信岡脊辯

王思訓黑水辯

閔洪學請滇路蜀粵並開疏

樊綽雲南界內程途述

騰越近邊關隘志

入緬路程記

入邊各路記

方輿紀要

附載自撰雲南水道記略

滇繫

十一

滇繫

旅途繫

趙州師 範荔屏纂輯

水路

全書金沙江考

江源出吐番共竜州東至巨津寶山三面環麗江至鶴慶受漾
 共江諸水又東經北勝受桑園竜潭程海諸水又東經姚安受
 蜻蛉大姚竜蛟諸水又東經楚雄定遠縣受竜川諸江水又東
 至武定元謀縣受苜甯河又東至祿勸州受滇池海口青魚塘
 甸基武定三泊邵甸螳川後甸松坪祿脹兩竜羅次石門五道

滇繫 十一之三

旅途

一

河羅畝大石壩富民只舊普渡河廣翅塘諸水又東經會理州
受甯遠越溪雙橋長河瀘沽打冲東河熱池諸水又東經東川
濟盧部過烏樟山受尋甸牛欄江壁谷川齒化溪諸水又東經
烏蒙南又東經馬湖受尼溪大小紋溪諸水又東至敘州府入
于江前僉事王惟賢議自雲南海口開至安甯羅米富民只舊
你革連古普渡安革法七革干土色江邊納木姑共十三程內
土革有疊水自武定金沙江巡檢司至馬喇母白馬口燦喇則
五曲革直勒則卓刺除魯圭甯折答甸沙吉撒麻村至土色大
河阿納木姑凡十四處內則卓沙吉有疊水近莊按察司祖詒

議自巡檢司開由白馬口歷普隆紅巖石喇鮓至廣翅塘皆祿
勸州地其下有三灘水溢沒石乃可放舟涸則躋岸纜空舟以
行又歷直勒村罵喇土色皆會理州地其下有雞心石石如堆
者三壘江中舟者相水勢緩急可行又歷踏炤亂得頭峽喇鮓
至粉壁灘甚駛皆東川地又歷驛馬河新灘至虎跳灘陰溝洞
皆巧家地虎跳湍瀉陡石不可行客舟陰溝二山頽集水行山
腹中皆从陸過灘易舟而下又歷大小流灘爲蠻夷司地又歷
黃郎木鋪貴溪砦業灘至南江口爲烏蒙府地始安流自廣翅
塘至南江木商行之可十日又至文溪鐵索江邊數灘歷麻柳

灣教化巖爲馬湖府地又厯拽灘蓮花三灘會溪石角灘至敘
州府

按金沙經營滇北合江漢朝宗爲南國紀昔在草昧夷落雄
睨南土凭恃斯險負固抗衡今車書大同極滇西鄙遠及窮
髮轍迹俱遍而其通道要津反棄之以與烏蠻巧色俾滋蟠
踞非所以宏一統也攷之紀載漢武先擊勞浸靡莫以兵臨
滇池而僞王俛首華陽國志云自爨道至朱提有水道步道
水道有黑水及羊官水至險難行步道度三津亦艱阻而行
人爲之謠曰檣溪赤木盤蛇七曲盤羊烏橐勢與天通今烏

橐在東川卽絳雲弄其山多雪四時不消金沙江出其下羊
官黑水非指茲江乎元至元十四年詔開烏蒙道愛魯帥師
擊玉連州所過城砦盡下之水陸皆置驛傳今烏蒙有羅佐
關其下有羅佐橋爲入滇要路則水陸皆在東川烏蒙間卽
所稱勞浸靡莫非乎核形勢商利鈍未有不先辟此險而能
控荒服破砦窳者壅塞砥怒流湫瀑瀉地之險也畫州啟道
崇伯子之智可師也陰陽詞說盜弄兵甲人之險也三表五
餌懷王傅之略可彷彿也茲江苟通則滇池之輕舸可挽而之
普渡建越之艤艫可汎而下瀘沽通滇蜀筋脈之會續長江

衣帶之勢是使諸夷不長纓而繫十五郡可裘領而挈也大哉明高皇帝之言曰關索嶺非正路正路當在西北猷之遠矣

永北張機南金沙江源流考

按大金沙江發源崑崙山西北吐蕃地卽夏禹所導黑水也雖與雲南小金沙江及瀾滄潞江皆發源吐番朕金沙江之源較三江最荒遠且其源于三江源邈不相近其下流亦十倍小金沙江及瀾滄二江之水按禹貢華陽黑水惟梁州黑水西河惟雍州周文安辯疑錄云甘肅志甘州之西十里有黑水流入居

延海肅州之西北有黑水東流荒遠莫窮所之是其源入雍州之西流入梁州之西南其正西別流遶西極之外而无所據見地勢西北最高故能經西而西南也雲南志載金沙江出西蕃流至緬甸其廣五里徑趨南海謂非黑水源出張掖流入南海者乎河源在中州西南直四川馬湖蠻邦之正西三千餘里雲南麗江宣撫司之西北一千五百餘里愚觀黃河源近雲南地則大金沙江源自番雍之地南入緬海論雍梁間水惟此大耳此水爲黑水无足辨矣朱子云天下有三大水曰黃河曰長江曰鴨綠江此語无怪也宋初斧畫雲南南渡又偏安一隅朱子

又從何知有此江之長廣于江河哉黃真元又云考大金沙江
瀾路三水雖皆入南海大小遠近迥不同瀾僅路四分之一大
金沙三倍于瀾路瀾路所出地名在鹿石山在雍望俱可窮源
上流亦狹大金沙江之源則遠出番域上流已闊澄若重溟黝
狀深碧夏秋漲溢江色不變若比于揚子滄浪一小溪卽詩語
大金沙江之長廣又可知矣其注云旁多松有琥珀自孟養地
來孟養正在金沙江之旁今瀾滄不聞有琥珀大理志指瀾滄
爲黑水亦不深攷耳相傳大金沙江上源近大宛國自里麻茶
山至孟養極北不聞有所往號赤髮楚人境峭壁不可梯繩弱

水不任舟楫土人惟遠見川外隱隱有人馬形似殆西羌之域
也今姑略其源惟自其經流支流入海可見者言之水流至孟
養陸阻地有二大水自西北來一名大居江又云大車江一名
檳榔江二水至此合流又名大盈江今騰越州人總甸內諸水
亦曰大盈江殆竊移其名也江流至此夷人方名其爲金沙江
江中產綠玉黃金鈿子金精石墨玉水晶間出白玉濱江山下
出琥珀舊志以琥珀綠玉出在瀾滄江者謬矣昔年王靖遠蔣
定西追麓川叛賊思機發思卜發兄弟造船飛渡孟養後又與
思祿盟誓江乾石爛乃許其過江者皆此江也滇人相傳名大

金沙江若以別麗江北勝武定馬湖之小金沙江耳自此南流經宦猛莫噉莫郎至猛掌有一江西來入大金沙江又南下昔朴怕鮮猛莫猛外經蠻莫有一江源自騰越大盈經鎮夸南甸干崖受盞西茶山古勇諸水伏流南牙山麓出經蠻莫入大金沙江江又經蠻法魯勒猛拱遮鰲官屯大菖蒲山峽小菖蒲山峽課馬孟養怕崩山峽戶董鬼哭山戛撒昔年緬人攻孟養以船運兵餉到戛撒爲孟養所敗者此江也正統中蔣雄帥兵追思機發爲緬人所壓殺于江中亦此江也大約江自蠻莫以上山聳水陡正統中郭登自貢章順流不十日至緬甸者亦此江

也下流經温板有一江源自騰越竜川江經界尾高黎共山隄川猛乃猛密所部莫勒江至太公城江頭城入于金沙江下流又經猛吉準古温板又名温板江温板又名流沙河相傳唐僧取經過此渡故名皆金沙江也猛戛馬噠喇至江頭城江中有大山極秀聳山上大寺又有一江源自猛辨洗毋戛南來入大金沙江又經止郎竜大馬革底馬撒躋馬入南海其江至蠻莫以下地勢平行江闊可十五里餘舊志云五里者非也經南江益廣流益慢緬人善舟又善泅水操櫓楫者如涉平地至是江海之水瀦爲一色矣文選載佛經云拔提河一名金沙池脫履金

沙云云金沙江亦名拔提河矣今再附攷蒙化府志瀾滄江與漾濞江蒙人謂之大小二江合西洱河勝備河至順蒙交界處土人謂之羅擦聚日出水光蕩射可觀不二十餘日至錦竜江卽水下流海多客船會易于此漸漸至南海永昌府志潞江一名怒江水經注云潞江楊慎云潞江今訛爲潞江源出吐蕃流經芒市至木邦地名渣哩江又流經八百車里地至擺古東入南海自木邦以來卽可通舟楫昔年隴川多土甯前往擺古見莽瑞體皆由此江順流而下也舊傳潞江流至洪門車里沙磧浸散與近騰越志以爲入大金沙江皆非是愚嘗謂二江皆可

舟可航夸人欲據險隱塞不使通行豈知天地設此三江正爲本朝制馭西南緬甸諸夷設當事者誠不可忽而不講求也異日 聖天子問緬甸諸夷久不朝貢之罪則此三江者固漢家樓船下番禺出奇制粵之牂牁江也

摘錄水道提綱雲南水道

按金沙江源出吐番共竜川犁牛石下謂之犁牛河又名犁水訛名爲麗又名麗江卽古名麗水蓋以其江內產黃金故名金沙江元世祖取大理用革囊爲筏以湓金沙江者卽此江也其流經吐番鐵城橋東經麗江府巨津寶山二州又東經鶴慶府

北勝州姚安府又自武定府北界經黎溪州蒙氏僭封爲四瀆之一亦卽此江也又自武定下流入濟慮部夷人鑿桐槽船以通往來行旅遂又名金沙渡又西過四川東川府一名黑水一名納夷朕皆金沙江別名又經四川行都司會川建昌德昌打冲等衛所又經烏蒙府又經馬湖府蠻夸長官司與馬湖江相合下流至敘州入岷江矣今自其支流者言之大理賓川大江北入金沙江鶴慶漾共江東南至竜珠山入石穴伏流復出金沙江三莊河與漾共江會流入金沙江北勝州桑園河經州西南桑園村下流入金沙江竜潭泉有九眼下流入金沙江程湖

南入金沙江姚安府蜻蛉河西經大姚縣東入金沙江竜蛟江一名苴泡江合姚州連場香水二河入金沙江安甯州螳螂川卽滇池所洩下流縈澗州治上過昆陽州下經富民縣入金沙江楚雄府竜川江西合諸水爲峨喙川又東合諸水經定遠縣黑鹽井下流入金沙江考安甯楚雄二水雖小皆可通舟楫武定府西溪河經楚雄府至元謀縣西入金沙江又勒夷水普渡河俱入金沙江以上皆雲南之水朝宗于東海順流于中國者四川東川府牛欄江源出尋甸府入金沙江辟谷川源出尋甸府白津河西入金沙江越嶲衛大渡河源出吐番下流合馬湖

江四川行都司甯遠河西南合瀘水入金沙江懷遠河南合瀘水入金沙江鹽井衛越溪河東合打沖河入金沙江雙橋河流經打沖河入金沙江會川衛瀘沽河源出小相公嶺入金沙江打沖河千戶所打沖河蠻名黑惠江又名納夷江源出吐番下流入金沙江石橋千戶所東河源出小相公嶺會瀘沽河入金沙江四川行都司南瀘水源出吐番流入金沙江元史云水源廣而多瘴鮮有行者春夏常熱可燔雞豚諸葛武侯五月渡瀘卽此水也元李景山云益州記水經俱以瀘水在永昌不韋縣寰宇記以爲在舊州會川縣景因出使越巂考瀘水源蓋建昌

瀘川驛有孟獲城又有瀘沽州孔明渡瀘由舊州入益部滇池此名渡瀘爲有驗今水出吐番過建昌會川合金沙江夾岸多高巖叢葦故下渡如經甌釜炎熱壅鬱多感瘴癘至今猶狀或以金沙江卽瀘水誤矣雲南之水迤東可通中國者如雲南府大城江自陽宗明湖經宜良入盤江臨安之瀘江曲江婆兮江入盤江澂江府之巴盤江鐵赤河入盤江廣西府之八甸溪入盤江盤江至府境水爲大曲靖府之瀟湘江白石江合盤江經交水至彌勒入平伐橫山砦下經廣西鬱江入于海廣南府西洋江入廣西田州府右江南注溪亦入右江尋甸府阿交合溪

入霑益州界北經廣西田州水行者安可忽之哉至如大理府西洱河下與漾濞江合流入瀾滄江漾濞亦名神莊江瀾滄江源出吐番自西而南至于麗江蘭州雲竜過永昌楚雄臨安車里大甸七十城門至交趾入海趙州白崖賧江一名赤水江下流至定邊名禮社江合瀾滄江臨安府西有禮社江入納樓茶甸界爲祿豐江徑合蒙自爲梨花江注于交趾清水江楚雄府馬竜江源自蒙化境由定邊磴嘉合白崖賧江南入元江景東瀾滄江大河源出定邊入馬竜江景東府杉木江馬涌江合南浪江入威遠州界永甯府羅易江北過府境勒汲河入四川鹽

井衛界順甯府備溪江西洱漾濞二水合流至本府鐵場山下合瀾滄江故名元江府禮社江一名元江源出白崖賧江合瀾滄江諸水入交趾新化州摩沙勒江卽禮社江下流至元江入交趾者樂甸長官景東河其源出景東經本甸下入馬竜江北勝州羅易江入永甯府白角河入西番界永昌府瀾滄江銀竜江入瀾滄江勝備河入備溪江路江一名怒江經芒市木邦八百下流爲喳哩江經擺古入南海檳榔江出吐番遶金齒百夷經干崖阿昔下合大車江至江頭城騰越大盈江一名大車入南甸爲小梁河至干崖爲安樂河西流爲檳榔江龍州江下流

至緬甸太公城合大盈江雲南府安甯河出安甯經富民羅次
爲沙摩溪至祿豐爲大溪至易門爲九渡河入元江又星宿河
出武定經祿豐過易門入元江蒙化府陽江出郡西北甸頭花
判澗南至甸尾過定邊與彌川禮社江相合過元江入海瀾滄
江與漾濞江蒙人謂之大小二江至順蒙交界處土人謂之羅
擦聚二水相交日出水光蕩射可觀不二十餘日至錦竜江一
名九竜航行會海客于此漸至南海愚謂雲南通緬甸諸夷水
路舊惟知有金沙江可通大舟不知潞江渣哩一派可通擺古
瀾滄銀竜一派可通八百交趾皆可舟可航之水經理緬甸者

誠不可不講求也故附及之

升菴集

孔明出師表五月渡瀘今以爲瀘州非也瀘州古之江陽瀘水
也乃今之金沙江卽黑水也其水色黑故以瀘名之耳沈黎古
志孔明南征由今黎州路黎州西百餘里至兩林蠻自兩林南
琵琶部三程至嶺州十程至瀘水瀘水四程至弄棟卽姚州也
今之金沙江在滇蜀之交一在武定府元江驛一在姚安之苴
却據沈黎志孔明所渡當是今之左卻也琵琶一作虱琵琶兩林
今之邛部長官司也

太和楊士雲議開金沙江書

按志金沙江古名麗水源出吐番界共童川黎牛石下名犁水
 誤犁為麗東經寶山巨津二州三面環麗江府東經鶴慶受漾
 共江諸水又東經姚安府受青蛉大姚竜蛟諸水又東經武定
 府受元謀西溪諸水又受滇池螳螂諸水又東經東川府西入
 滴瀘部受尋甸牛欄谷壁衛嚙化諸水又東經烏蒙南又東經
 鹽井建昌會川越雋諸衛合瀘水受懷遠宜遠越淇雙橋長河
 瀘湘大洞魚洞羅羅打冲東河熱池諸水又東至馬湖府受泥
 淇大小汶諸水又東至敘州府受岷江此南中西北之險蒙氏

僭稱北瀆者也按史漢武帝遣馳義侯開越嶺郡尋遣郭昌等
 開益州郡諸葛武侯渡瀘南征斬雍闓擒孟獲遂平四郡定滇
 池皆先奪此險也始通西南諸夷歷晉及隋通壅靡常至唐蒙
 氏世為邊患至酋龍極矣屢寇黎雅一破黔雅四盜西川皆由
 據此險也遂基南詔亡唐之禍宋太祖鑒此以玉斧畫大渡河
 曰此外非吾有棄此險也遂成鄭趙楊段氏三百餘年之僭元
 世祖乘革囊及筏渡江進薄大理擒段智興破此險也遂平西
 南之夷至國初梁王拒命我明太祖高皇帝命將征討神機廟
 算悉出之聖裁諭穎川侯等曰關索嶺路本非正道正道又在

西北蓋謂此也班史謂皆恃其險乍臣乍驕范史謂憑深阻峭
行紆岐道宋祁謂喪牛于易患生无備誠確論也况乎雲南四
大水惟金沙江合江漢朝宗于海爲南國紀天設地造本爲天
下用也歷代乃棄諸夸曾資其桀鷲雖建立城戍僅僅自守時
或陷沒豈知天有宿度地有經水人有脈絡禹貢于每州未必
曰浮某水達某水入某水逾某水蓋紀貢道達帝都普天下大
勢以水爲經紀也孰謂滔滔大川可浮可達反舍而陸乃北至
永甯東至鎮遠不亦勞乎禹外薄四海各迪有功夫一勞久逸
暫廢永甯執事之議詳矣爲國家慮深且遠矣所謂計費吝賞

責效讒言斯固古今之恆態不能成天下之事者也朕英傑見
同必有繹之者纘神禹疏鑿之績恢四海會同之風息東西兩
路之肩拊滇雲百蠻之背昔爲絕海奧區今爲掌中腹裏以明
大一統无外之治億萬年无疆之休實在乎此凡有識者咸日
望之庶幾見之惟執事留意幸甚

麻城毛鳳韶疏通邊方河道議

竊炤雲南地方有水路直抵四川馬湖府初以遐僻爲禹迹所
不到遂爲土人所據幸值我國家始郡縣其地同于華夏然貢
獻之物楨官使之行李軍民商賈之物貨擔負萬里筋力已疲

而土官土舍因見道路阻絕每懷異志及今國勢強盛不行開
通將來之悔不敢謂无也本道訪據武定府揭帖內開本府有
池東通四川水路自雲南海口至安甯羅末富民只舊你革達
吉普渡河安革法干土色至大江俱本省地方大江至四川東
川地方大江邊阿納木姑共一十三站內土色有疊水又有池
西通四川水路自雲南陸路至富民武定虛仁環州至金沙江
巡檢司凡五站本司金沙江水路下船至罵刺母白馬口燦刺
則五曲革直勒則卓刺除魯圭甯抄荅甸沙吉撒麻村亦至土
色大江阿納木姑凡一十四站內則卓沙吉有疊水等情又據

金沙江巡檢司應襲巡檢土舍李朝宣稟帖內開金沙江上至
麗江瀾滄至姚安府武定府下至東川烏蒙芒部上江宏治正
德中馬湖府安監生放杉板嘉靖十七年王萬安亦放杉板俱
係拖梢五板大船經過或十餘隻或八九隻建昌行都司奉文
欽取大木甯番越嶲鹽井建昌等五衛俱在上江打冲河三江
口并德昌千戶所地方或割簾或散放會川衛在下江科州探
砍查審開江船行若問灘水險阻魯開虎跳灘天生橋十分不
爲險阻等情又審據本府姜驛驛丞梁松稟稱本驛設在金沙
江巡檢司之西過江五十里與四川會川衛抵界每見客人來

販木剖成簰筏自本司江流而晝夜六日卽抵馬湖隨簰下船
或一二十隻裝載糧食有養豬畜客人跳簰擲船如履平地離
本司下江五六十里有大小虎跳灘俱是金沙江至冬春水落
之際可以施工開鑿等情又據本府揭帖內開據經過建昌客
人何松執稱建昌衛管下德昌守禦千戶所洗迷村伐木下江
頭一程至白水站一程至會川衛管下甸沙關一程至梅易千
戶所三程至武定府和曲州金沙江等情隨喚何松亦稱馬湖
建昌等處客人採取大小板枋俱是德昌下河从金沙江巡檢
司經過直至馬湖敘州令伊畫圖各到道爲照前項河道武定

迤東極爲捷徑且甚便益但訪得河內間有蠻尖石兩邊崖石
生合成橋水从石縫流下未委虛的若迤西金沙江則水面洪
闊四時橫流客商通販前后不絕中間雖有虎跳二灘狀皆沙
石易鑿此則斷狀可通而無疑者也先年巡撫都御史黃衷曾
議開脩取金沙江巡檢司曠受招集馬湖橫江客人俱到布政
司舉行間以陞遷中止近年巡撫都御史汪文盛亦曾委官踏
勘以征南中止事功之會人咸惜之合无批行總司會同布都
二司從長計議先將東西二道合委能幹文武重職帶同屬官
多給官銀督同本處土官土舍俱優其廩給帶領木竹石鐵等

匠厚其口糧衣鞋沿途用銀僱倩熟知地利鄉道人役隨帶小船及沿河採買竹木扎爲簾筏乘載通行逐處踏勘直至馬湖大江而上中間要見舟楫无礙徑行者幾處危石可鑿者幾處幾丈幾尺如有絕險人力所不能施者作兩截盤運沿河陸路可通者幾處不通者幾處應令開闢者幾處幾里幾十步及沿河有无人烟稀密堪立驛遞舖分哨堡等項各計合用功力夫匠若干錢糧若干悉心料理勘估明白畫圖帖說並將用過官銀具由造冊回報然後擬議奏請行委三司堂上官親詣督理開通施行則不獨一時一方之利實我國家久安長治之計策

也

仁甫氏舊志曰梁州黑水今瀾滄江是此江所經狹壑深塹兩山夾流原非禹鑿元張立道使交趾由黑水入三崇山瀾滄經其麓今其地蓋有黑水祠乃永昌諸生黃貞元又以黑水歸金沙江謂有兩金沙又非李氏以瀾滄爲黑水以江內外分夷漢又非樊綽以麗水爲黑水非程氏以西洱爲黑水非地里志以南廣爲黑水也

此顧氏語也鄙意直以黃論爲確

江陰徐宏祖溯江紀源

江河爲南北二經流以其特達於海也而予邑正當大江入海

之衝邑以江名亦以江之勢至此而大且盡也生長其地者望
 洋擊楫知其大不知其遠溯流窮源知其遠者亦以為發源岷
 山而已予幼考紀籍見大河自積石入中國溯其源者前有博
 望之乘槎後有都實之佩金虎符其言不一皆在崑崙之北計
 其地去岷山西北萬餘里何江源短而河源長也豈河之大更
 倍於江乎迨踰淮涉汴而后睹河流若帶其闊不及江三之一
 豈江之大其所入之水不及於河乎迨北歷三秦南及五嶺西
 出石門金沙而后知中國入河之水為省五陝西山西河南
山東北直隸入
 江之水為省十一西北自陝西四川河南湖廣江西南西南自雲
南貴州廣東廣西福建浙江○應言十二省

遺江計其吐納江既倍於河其大固宜也按其發源河自崑崙

西也之北江亦自崑崙之南其遠亦同也發於北者曰星宿海佛經謂之

從多北流經積石始東折入甯夏為河套又南曲為龍門大河

而與渭合發於南者曰犁牛石佛經謂之南流經石門關始東

折而入麗江為金沙江又北曲為敘州大江與岷山之江合予

按岷江經成都至敘不及千里金沙江經麗江雲南烏蒙至敘

共二千餘里捨遠而宗近豈其源獨異乎非也河源屢經尋討

故始得其遠江源從無問津故僅宗其近其實岷之入江與渭

之入河皆中國之支流而岷江為舟楫所通金沙江盤折蠻獠

溪洞間水陸俱莫能溯

在敘州者祇知其水出於馬湖烏蒙而不知上流之由雲南麗江而在雲南麗

江者知其為金沙江而不知下流之出敘為江源○雲南亦有二金沙江一南流北轉即此江乃佛經所謂疏伽河也一南流下海即王靖遠征麓川緬人恃以為險者乃佛經所謂信渡河也雲南諸志俱不載其出入之異互相疑溷尚不悉其是一是二分北分南又何由既不悉其孰遠孰近第見禹貢岷山導江辨其為源與否也

之文遂以江源歸之而不知禹之導乃其為害於中國之始非其濫觴發源之始也導河自積石而河源不始於積石導江自岷山而江源亦不出於岷山岷流入江而未始為江源正如渭流入河而未始為河源也不第此也岷流之南又有大渡河西自吐番經黎雅與岷江合在金沙江西北其源亦長於岷而不

及金沙故推江源者必當以金沙為首不第此也宋儒謂中國三大龍而南龍之脈亦自岷山瀕大江南岸而下東渡城陵湖口而抵金陵此亦不審大渡金沙之界斷其中也不第此也並不審城陵磯湖口縣為洞庭鄱陽二巨浸入江之口洞庭之西源自沅發於貴州之谷芒關南源自湘發於粵西之釜山龍廟鄱陽之南源自贛發於粵東之瀨頭平遠東源自信豐發於閩之魚梁山浙之仙霞南嶺是南龍盤曲去江之南且三千里而謂南龍瀨江乎不第此也不審龍脈所以不辨江源今詳三龍大勢北龍夾河之北南龍抱江之南而中龍中界之特短北龍

亦祇南向半支入中國俱另有說惟南龍磅礴半宇內而其脈亦發

於崑崙與金沙江相持南下經石門麗江東金沙西瀾滄二水夾之環滇池

之南由普定度貴竺都黎南界以趨五嶺龍遠江亦遠脈長源

亦長此江之所以大於河也不第此也南龍自五嶺東趨閩之

魚梁南散為閩省之鼓山東分為浙之天臺雁宕正脈北轉為

小箬嶺閩浙界度草平驛江浙界峙為浙嶺徽浙界黃山徽甯界而東抵

叢山關績溪建平界東分為天目武陵正脈北渡東壩而峙為句曲

於是迴龍西結金陵餘脈東趨余邑是余邑不特為大江盡處

亦南龍盡處也龍與江同發於崑崙同盡於余邑屹於江海鎖

關鑰以奠金陵擁護留都千古不拔之基以此豈若大河下流

昔曲而北趨碣石今徙而南奪淮泗漫無鎖鑰耶然則江之大

於河者不第其源之共遠亦以其龍之交會矣故不探江源不

知其大於河不與河相提而論不知其源之遠談經流者先南

而次北可也

鶴慶史秉信岡脊黑水辯

按禹貢華陽黑水惟梁州黑水西河惟雍州導黑水至於三危

入於南海凡三見滇古梁州域也昔辯黑水者如聚訟或問余

曰黑水地志出犍為謬矣水經出張掖至燉煌過三危入南海

燉煌瓜州也實未嘗有此水跨越諸山入南海武彝熊氏之說
詳矣唐樊綽又指麗水爲黑水麗水金沙江也金沙果黑水乎
余曰金沙出吐番經麗江鶴慶姚安武定入馬湖會岷江入東
海此爲黑水所謂入於南海何居或又曰程氏以麗水狹不足
界二州西洱河與漢葉榆澤相貫廣可二十里其流正趨南海
西洱今大理海也西洱果黑水乎余曰西洱源一發於鶴慶分
水嶺一發於浪穹罷谷此爲黑水所謂惟雍州者何居或又曰
西遠彝方有大金沙江發源崑崙西北吐番地廣五里產黃金
綠玉琥珀水晶其流正趨南海西南惟此水爲大張機會有者

然則大金沙爲黑水乎余曰洱水之西爲瀾滄再西爲潞江又
再西爲大金沙大金沙者長廣三倍於瀾滄遠出番域上流已
闊澄若重溟黝然深碧夏秋漲溢江色不變騰越黃真元言之
甚悉第此水去梁荒遠此爲黑水所謂華陽者何居所謂至於
三危者又何居榆李仁甫黑水辨以瀾滄江爲黑水云隴蜀滇
三省鼎立隴西南斜長入蜀滇西北斜長近隴蜀則尖長入滇
滇隴之間如三足旛然黑水源正在旛頭故雍以黑水爲西界
以山論麗雪山與蜀松州諸山相接松去雍不遠計瀾滄之源
當在雍之西元張立道使交趾由黑水入三崇山瀾滄經其麓

地有黑水祠仁甫考究不無據又大理志雲龍州有三崇山頂
列三峯高萬仞下環瀾滄卽古三危樊綽云三危臨峙其上玩
禹貢至於二字皆水行而經歷之詞鄒氏指三危爲燉煌程氏
指爲宕昌去水經行之道遠則三崇爲三危之說亦或可信如
厯山有二崆峒有三豈三危必三苗之敘者也諸說難盡非之
但余鶴居滇上游金沙出左瀾滄居右西洱匯前生斯長斯日
遊於斯而不察可怪也考蔡註云梁雍二州皆以黑水爲界黑
水自雍西北直出梁西南中國山勢岡脊皆自西北來積石西
傾岷山岡脊以東之水旣入於河漢岷山岡脊以西之水入於
南海卽爲黑水此說廣而有據何也鶴之山皆自西北來凡脊
以東之水皆歸東海金沙江是也脊以西之水皆歸南海瀾滄
江是也則此中爲岡脊疇能易之如鶴走榆經山神哨舊名分
水嶺草間湍出盡亂流耳北流者入樣工會金沙轉東海南流
者合浪穹水匯爲西洱歸南海夫咫尺間分東南海之異於岡
脊之說誠有脗合者人自不察耳如鶴距劍一脊耳脊西之水
如清水江入劍湖由點蒼皆合洱水瀾滄歸南海清水江脊以
東之水或流山谷爲澗或瀦山麓爲潭或入漾江合金沙歸東
海由劍而遡之老君山水流之麗則歸金沙入東海流之蘭則

入瀾滄歸南海無不然者又自洱西達滇孔道遙從南北指點之趙州禮社江定西嶺赤水江雲南縣溪溝諸水皆合瀾滄歸南海也賓川大河姚安蜻蛉河大姚河合金沙歸東海者也鎮南水南入元江者爲馬龍江北入金沙者沙橋之水發源爲楚雄龍川江廣通之羅繩河則流黑井入金沙捨資河則出南安達元江池西至武定之水發源爲捨資河入元江元謀應元溪祿普渡河又北入金沙矣羅次祿豐安甯易門三泊皆犄角於會城西南羅次之星宿河由祿豐而南出元江安甯之水乃滇池末流北出富民入金沙三泊資利河北注滇池又有丁癸江

南流矣易門之九渡河亦南入元江由此而昆陽晉甯歸化呈貢宜良及澂江府州縣皆環會城而居南居東者昆陽渠濫川晉甯大堡河歸化之交七浦呈貢之洛龍河皆注滇池如澂江新興大溪河江川星雲湖澂江撫仙湖路南興甯溪陽宗明湖大衝河皆南入盤河與滇池了無涉矣至新興西北七十里習蒙山頂分晉甯界晉甯之大堡河皆發源於新興江川北疊翠山山半泉湧三派西流入滇池東南入撫仙星雲二湖與鶴分水嶺咫尺分東南海者無以異此間顧非岡脊而何謂大水既分小水亦必從之其間俱有如山神峭疊翠山者第龍有起伏

經折居其間者當自得之由澂江而北宜良之盤江大城江馬龍水發源爲曲靖之瀟湘江平彝之十里河皆入南海者也尋甸水發源爲東川府之牛欄江又水之入東海者也又霑益南爲交河入盤江霑益西東翁江入金沙又有南盤北盤二水分流各千餘里諸水分東南海者皆由源以窮之非溯流漫不知其源者也由是觀之所謂岡脊者西傾積石岷山脊之巔也鶴西嶺以及姚安楚雄武定昆明澂江曲靖尋甸之間脊之腰絡也由此而出黔蜀如地理書所稱南幹龍或發節生枝水之分咸有若是焉者乎故云岡脊之說有昭合者或曰信斯言脊以

西之水皆黑水瀾滄也西洱也大金沙也皆黑水矣酈道元謂西洱葉榆積漬所成謂之黑水豈岡脊以西皆榆乎余曰脊以西雖不必皆榆然西南之山干霄翳地隨刊未施時山木積漬成渠何必榆始黑也朱子云黑水從雍梁西界入南海不經中國知言哉山海西山經云崑崙之邱西流於大杆軒轅之邱洵水出焉南漾注於黑水所指皆西南是黑水實不入中國也或又曰顧野王輿地志黑水由棘道入江余曰棘道烏蒙地也入南海者曰入江可爲噴飯若夫遼東黑河趨東海肅州有黑水無跨河越脊理若水名黑水卽北金沙入東海皆非禹貢之黑

水不足辨矣沿革有時而更江山千古不易山脊水源具在使宋諸賢復生履滇鶴之域而指顧之必不易吾言也夫邇諸葛元聲滇史亦舉岡脊一說惜不得於李仁甫草黑水辨張機作大金沙江考時以大全岡脊之說一詰之

昆明王思訓黑水辨

梁雍皆以黑水爲界諸家考證互異酈道元謂其出張掖雞山南至燉煌過三危山入於南海樊綽謂其爲麗水程氏謂其爲西洱河蔡傅王之李元陽謂其爲瀾滄江張機謂其爲大金沙江按張掖河出祁連山流至甘州城西與弱水合名曰黑水南

至肅州鎮夷堡邁合黎山麓北匯於居延海流入沙漠是爲雍州極北境滇爲梁州極南境中間祁連山綿亘千餘里山南澧水湟水自西而東二水之南爲黃河走東北而二水入之黃河之南有洮河亦走東北入河又南積石山河州二十四關悉崑崙之脊而秦嶺之岡也高大蜿蜒東西且數萬里岡脊以北之水皆曰河以南曰江一行所謂兩戒也黑水出張掖豈能飛越而南即使汎流亦不能汎數千里復出入海禹貢黑水西河惟雍州言黑水雍州西界也其于導雍水也但云弱水不言黑水者何弱水與張掖河兩源也至甘州匯爲一河曰黑水言弱水

卽言黑水弱水既西黑水既西也既西不復南矣其于黑水也
復言導者何別梁之黑水非雍之弱水也果梁之黑水源出張
掖則經文當統言導弱水至于合黎入於流沙經三危踰于河
入于南海矣既言導弱水復言導黑水是二水也其言餘波者
何餘波卽下流也入于流沙非入於南海也然則雍入流沙之
黑水非梁入南海之黑水明矣麗水今北金沙江也出吐蕃黎
牛石下經麗江府循姚州武定達馬湖入江不入南海西洱河
發源罷谷山流經浪穹合蒲陀江至大理府匯爲西洱河卽葉
榆水也遶府西南穿石穴出點蒼山後至蒙化界會漾鼻江入

於瀾滄江瀾滄源出吐蕃麗石山下入滇境首過蘭州故曰瀾
滄由麗江府經永昌蒙化順甯景東元江達車里入於南海梁
州境內別無水入南海入南海者惟潞江與瀾滄而潞源既近
不足括梁境元陽崑指瀾滄爲黑水近似惜未辨其源不出于
張掖也張機謂瀾滄非黑水以其有南金沙江也謂源出吐蕃
近大宛國流至騰越外之鐵壁關廣十有五里名大金沙江澄
若重溟黝然深碧夏秋漲溢水色莫辨環緬甸太公江頭二城
直入南海其見甚卓惜無明徵且亦未免源出張掖之見也愚
意瀾滄南金沙二江皆入南海而南金沙源廣流長大于瀾滄

滇東
數倍其爲黑水無疑昔永明王走緬己亥二月朔渡大金沙江
人言卽古黑水是一證也特不可謂源出張掖耳或疑三危山
在雍州西境與南金沙江何涉然必謂三危山在雍州西境又
與南海何涉自吐蕃距緬崇山不可紀極三危山或逸其名亦
未可知今大理雲龍州三崇山壁立萬仞舊志曰古三危山也
謂必在雍州西境耶鄭氏曉曰韓苑洛言雍梁二州是兩黑水
不相通觀此知源出張掖合弱水爲雍之黑水則知源近大宛
流入緬甸爲梁之黑水矣不然雍州之平涼甯夏俱有黑水蜀
之疊溪亦名黑水滇地有黑水祠皆可臆指遷就而聖王畫野

分州之大川大絡不復分明豈非禹貢之罪人與

烏程閔洪學請滇路粵蜀竝開疏

臣戒裝於武林聞黔警隨具通粵一疏齋沐拜發一面兼程馳
至湘潭滇役自粵來者言富州廣南之間炎瘴正熾必霜降後
可行不得已同新按臣暫駐兼臣前疏恭候廟裁久之不得部
覆疑是僻縣鈔傳遲漏之故乃煌煌君命致久宿於草莽臣之
寸衷萬萬不敢卽安以九月初自衡永折而之粵經桂平蒼梧
邇潯江而上以十月十八日抵南甯而臣之滯於道塗旣八閱
月矣自此以進再十日可自養利入龍英土界再四十餘日可

脫廣南而出臨安臨安望省城五百里而近臣之受事殆有期也土司一帶不獨攀葛懸崖之艱觸瘴衝嵐之苦與夫裹糗露宿飲食啟處之大不堪已也藝漢官之威儀而損朝命之靈重履虎探穴輕以身試不測之淵中間關係實在國體臣念之凜凜亦既幾經躊躇而竟出於此直無如封疆之不可棄畏此簡書何耳雖然臣入矣全滇各員以千百數今而後復有踵臣而問途者乎今日之滇如在井底人之脫離慶若更生其視入之也殆甚於從井自黔警以來數聞出滇者矣未見有奉檄而入者也而况行道之奇難加諸部議之未決人觀望次且何憚而

不裹足恐臣等雖入而路終於未通各官終於不來此垂危垂絕之孤滇必非臣一手一足之所克撐終於不可爲也或謂粵之外尙有蜀會川一徑不知蜀之有徑何妨兩存今宇內各省靡不四通八達滇之受病正以靠黔一綫至此爲窮蹙耳且臣於粵蜀籌之至熟彼此得失亦略相當自金沙趨建昌計程半月可達誠不若粵土司界中逾數旬之逶遲然蜀止會川一隙而粵田州歸順泗城安隆在在可走蜀之東川方煽逆弄戈而粵諸酋素號恭順卽撫臣何士晉止慮一田州近語臣已俛首就戎索是粵之與蜀各有利害各有難易其交難專倚政其不

滇界
容偏廢者矣以蜀言之建昌會川之間營哨某列特向非通塗
或各存實亡夫馬廩糧多所缺略今亡者應議修復缺者應議
添加若會川以南數站原無營哨則須從新規畫俟臣履任會
蜀委官相度隨宜措置應自非難乃盜賊出沒須於要害設兵
置防必我兵力足制賊死命庶以備非常而護行李克稱周行
也至粵中所疑不過謂土酋不欲我據其腹心我於其地張官
置吏召夫養馬非所安耳今但於所經應泊去處量建公所卽
募土人看守我往來其間過而不著不異蘧廬而又徒御供億
一切自備秋毫於彼無涉彼又何嫌何難而不帖以相從通行

之後商賈熙熙攘攘彼更從而利之矣此路在滇界十之七八
在粵止二三於滇無闕於粵亦可行也惟滇行粵中粵費出額
外不容不協濟而數未易酌今議該省驛傳道特置滇差簿用
印鈐記分發州邑各一本必真正勘合火牌方准應付登註不
得徇情濫應歲終道核而彙其數而滇償之滇輪蹄止有此數
兩路分行所協濟於粵應不多金也臣與粵撫一一從長面相
商確別無窒礙建昌雖臣撫屬兼轄事于創始須蜀爲政代乞
皇上俯允臣議勅下兵部行二省各該撫按刻期料理共期爲
滇造命俾滇無路而有路庶朝廷無滇而有滇矣抑臣更有請

焉滇去長安萬里雜職小吏除滇缺者例給以火牌腳力蓋恤其遠也至長吏以上則否今粵蜀新闢險遠艱危殆什百於昔矣夫必長僱馬必買喂其費不貲彼寒儒筮仕何從辦此就難助之難拋苦資斧之未措倚道徬徨廢然而返繫豈無人情固可念倘皇上加惠遠疆曲憐遠吏特勅該部於新選滇中郡邑等官量給應付使稍省內地之資糧用充新路之行李是亦為入滇者勸駕而通路之當併及者也

樊綽蠻書雲南界內程途

苴咩上音斜下城從安南府城至蠻王見坐苴咩城水陸五十符差切

二日程只計日無里數從安南上水至峯州兩日至登州兩日至忠誠州三日至多利州兩日至奇富州兩日至甘棠州兩日至下步三日至黎武賁柵四日至賈勇步五日已上二十五日程並是水路大中初悉屬安南管係其刺史並委首領句當大中八年經略使苛暴川洞離心疆內首領旋被蠻賊誘引數處陷在賊中從賈勇步登陸至矣符管一日從矣符管至曲烏館一日至思下館一日至沙隻館一日至南場館一日至曲江館一日至通海城一日至江川城一日至管甯館一日至鄯闡柘東城一日案柘東舊唐書及通鑑俱作柘東胡三省云言開拓東境也新唐書作柘从木與此同從柘東

節度城至留實館一日安甯館本是漢甯郡城也從安甯城至
 龍和館一日至沙雌館一日至曲館一日至沙邵館一日至求
 贈館一日至雲南驛一日至波大驛一日至白崖驛一日至龍
 尾城一日李宓伐蠻於龍尾城誤陷軍二十萬衆今爲萬人冢
 至陽案陽新唐書作羊苴咩城一日
 自西川成都府至雲南蠻王府州縣館驛江嶺間關塞並里數
 計二千七百二十里
 從府城至雙流縣二江驛四十里至蜀州新津縣三江驛四十
 里至延貢驛四十里至臨邛驛四十里至順城驛五十里至雅

州百丈驛四十里至名山縣順陽驛四十里至巖道縣延化驛
 四十里從延化驛六十里至管長貢關從奉義驛至雅州界榮
 經縣南道驛七十五里至漢昌六十里案此句上屬雅州地名有脫文
 葛店至皮店三十里至黎州潘倉驛五十里至黎武城六十里
 至白土驛三十五里過漢源縣十里至通望縣木篋驛四十里去大渡十里
 至望星驛四十五里至清溪關五十里至大定城六十里至達
 士驛五十里黎舊二州分界至新安城二十里至菁口驛六十里至榮
 水驛八十里至初裏驛三十五里至臺登城平樂驛四十里古縣
 廢今至蘇祁驛四十里古縣至嵩州三阜城四十里州城在三阜山上至沙

也城八十里

故雋州太和年移在臺登

至儉浪驛八十里至俄淮嶺七十里

下此嶺入雲南界已上三十二驛計一千八百八十里

案上文惟三十

驛計一千四百九十五里與此數不符

並屬西川管差官人將軍專知驛務

雲南蠻界從雋州俄淮嶺七十里至菁口驛三十里至茈驛六

十里至會川鎮差蠻三人充鎮五十五里至目集館七十里至

會川有蠻充刺史稱會川都督從目集驛至河子鎮七十里瀘

江乘皮船渡瀘水從河子鎮至末柵館五十里至伽毘館七十

里至清渠鋪八十里渡繩橋

雲南行記云渠桑驛

至藏傍館七十四里至

陽褒館六十里過大嶺險峻極從陽褒至弄棟城七十里本是

姚州舊屬西川天寶九載為姚州都督張乾

案乾唐書作虔

陀附蠻所

陷從弄棟城至外彌蕩八十里從外彌蕩至求贈館

案此句下有脫文

至雲南城七十里至波大驛四十里至渠藍趙館四十里至龍

尾城三十里從龍尾城至陽苴咩城五十里以上一十九驛計

一千五十四里

案十九驛共計一千六十九里與此數亦不符

從石門外出魯望昆州至雲南謂之北路黎州清溪關出邛部

過會通至雲南謂之南路從戎州南十日程至石門上有隋初

刊記處云開皇五年十月二十五日兼法曹黃榮領始益二州

石匠鑿石四孔各深一丈造偏梁橋閣通越析州津州蓋史萬

歲南征出於此也越析州今西河河東一日程越析州諮長故地也津州未詳其處天寶中鮮于仲通南溪下兵亦是此路後遂閉絕僅五十年來貞元十年南詔立功歸化朝廷發使冊命而邛部舊路方有兆吐蕃侵鈔隔關其年七月西川節度韋皋乃遣巡官監察御史馬益閉石門路量行館石門東崖石壁直上萬仞下臨朱提江流又下入地中數百尺惟聞水聲人不可到西崖亦是石壁傍崖亦有閣路橫闊一步斜互三十餘里半壁架空欹危虛險其安梁石孔卽隋朝所繫也閣外至夔嶺七日程直經朱提江下上躋攀偃身側足又有黃蠅飛蝱毒蛇短

狐沙虱之類石門外第三程至牛頭山山有諸葛古城館臨水名馬安渡上源從阿等路部落遶蒙夔山又東折與朱提江合第五程至生蠻阿部落第七程至蒙夔嶺嶺當大漏天直上二十里積陰凝閉晝夜不分從此嶺頭南下八九里青松白草川路漸平第九程至魯望卽蠻漢兩界舊曲靖之地也曲州靖州廢城及邱墓碑闕皆在依山有阿竿路部落過魯望第七程至竹子嶺嶺東有暴蠻部落嶺西有盧鹿蠻部落第六程至生蠻磨彌殿部落此等部落皆東爨烏蠻也男則髮髻女則散髮見人無禮節拜跪三譯四譯乃與華通大部落則有鬼主百家二

百牛馬案此句未詳無布帛男女悉披牛羊皮第九程至制長館于是始有門閣廨宇迎候供養之禮皆漢地凡從魯望行十二程方始到柘東

黎州南一百三十里有清溪峽乾元二年置關關外三十里卽舊州界也行三百五十里至邛部川故邛部縣之地也下南一百三十里至臺登西南八十里至普安城劍南西川節度使重兵大將鎮焉臺登直北去保塞城八十里吐蕃謂之北谷天寶以前舊州柳強鎮也自入吐蕃更增修嶮因城下有路向曩恭地谷東南一百三十里至羅山城天寶以後吐蕃新築非國家

舊城貞元十年十月西川節度兵馬與雲南軍併力破保塞大定獻俘闕下十一年正月西川又拔羅山置兵固守邛南驛路由此遂通臺登城直西有西望川行一百五十里入曲羅瀘水從北來至曲羅縈迴三曲每中間皆有磨些部落以其負阻深險承上莫能攻討案承上蠻官名見後文瀘水從曲羅南經劍山之西又

南至會同川邊水左右總謂之西蠻邛部東南二百五十里至勿鄧部落大鬼主夢衝地方闊千里邛部一姓白蠻五姓烏蠻初止五姓在邛部臺登中間皆烏蠻也婦人以黑繒爲衣其長曳地又東欽兩姓在北谷皆白蠻二姓皆屬夢衝內受恩賞於

國外私于吐蕃貞元七年節度使韋皋使嵩州刺史蘇隗殺夢
衝因別立大鬼王勿鄧南七十里有兩姓部落

案此下當有闕文

騰越近邊關隘

古有散關四古勇合澤猛連馬面是也古勇馬面今為七隘之
二合澤則近在城南三十里路通矣散而猛連在城東六十里
皆為內地知前明之防護較今時為近也今八關七隘亦已有
廢興者焉八關一曰銅壁關設於布嶺在蠻哈山內南甸宣撫
司地所以控制蠻哈海黑蠻暮之要隘也一曰萬仞關設於蓋
達山在吊橋後猛弄山頂所以控制港得港勒池西等之要路

也一曰神護關設於蓋西後猛戛山所以控制茶山古勇威緬
池西等路也一曰巨石關設於戶岡息馬山所以控制戶岡池
西要路也此四關明陳用賓設蠻哈守備以守之者也一曰鐵
壁關設於等練山所以控制蠻暮之水路也一曰虎距關設於
邦杭山所以控制蠻棍遮釐先腦猛密之要路也一曰天馬關
設於邦欠山所以控制猛廣猛曲猛密等處之要路也一曰漢
龍關設於工回者也此四關者明陳用賓設隴把守備以守之
者也昔八關而今止七關蓋漢龍關已淪入木邦其工回地亦
無可考矣乾隆三十五年設各關正副撫夷加邦中山杉木籠

山壩尾三卡設有撫夷焉七隘一曰古勇隘隘口在膽札山也其地自緬箐三十里至黃草壩箐口二十里至甸頭正龍寺二十里至田心街三十里至冷馬五里至膽札其地有天造地設一境四面圍山對山名瑯琊山石峯峭壁玲瓏出奇洵稱隘口詢之士人此地有路三條通夷境至小茶山一曰路外卽金沙江流入麗江者蠻暮夏鳩地亦可通一曰明光隘由固東汎至明光八十里其地兩旁夾江別有天地前明時有六廠其地田壩迤邐前行約五十里據土弁云已到隘口過此卽爲野人境恐其說尙荒謬也一曰滇灘隘明史宣德五年置滇灘關巡檢

司以茶山長官司請滇灘當茶山瓦高之衝蠻寇出沒民不能安通事段勝頗曉道理能安人心乞以勝爲巡檢從之明季茶山副長官司早大宸所部爲野人殺掠無遺奔內地則此關所設之巡檢想亦同時並亡今之土目起自雍正年間其前建置不可考矣滇灘自固東營八十里至忠孝寺再三十里至關其田壩甚寬各夷寨新田環處已爲樂土一曰止那隘在蓋西境其地有江流由古勇蠻日江入止那繞蓋西赴干崖之海壩江路通神護萬仞兩關又通古勇之奔麻山亦一要路也一曰馬面隘舊號馬回關訛回爲面乃前明古關也其地遠通雲龍五

井近接十五喧爲鹽梟出沒之所近以土弁廢弛立柵稽查較爲周密然日久仍復弊生矣一曰大塘隘卽巔塘關也路界明光馬面之間通野夷其地南越大山西南遶古勇山北州城之遠脈卽由此而來東突者爲尖山東南突者爲馬鞍山又分支南下爲寶峯山又爲播鼓山龍光臺其自馬鞍山從巔從南環赤土舖而入來鳳山蓋巔塘卽巔塘字相似而誤也班志云巔唐有周水首受徼外又有類水西南至不韋行六百五十里今潞江龍川江俱從大塘隘流入中國其卽周水類水歟按七隘昔入永昌道由魚村天馬臨江木瓜寨石塘黃連河上山心舖

至八灣其分水嶺卽古全勝關爲隘口之一而今以蓋西當之也六隘均有土弁駐守惟蓋西未立耳分水嶺在州東北而蓋西在州之西介神護萬仞兩關之間云

入緬路程

由騰越州城南六十里爲曩宋十里爲南甸土司故爲府由南甸左行六十里爲龍抱樹又五十里爲杉木籠山山之險者也又三十里爲蠻隴又六十里爲隴川土司又四十里爲邦中山又一百里爲猛卯土司凡四百五十里自南甸右行二十里至沙冲二十里至猛宋五十里至黃陵岡五十里至干崖土司入

滇東
十里至蓋達土司三十里至太平街又自翁輪三十里至銅壁關凡三百五十里此自州由南分左右之里數也自隴川八十里至腊撒土司戶撒在其北三十里自腊撒至鐵壁關八十里由鐵壁而左二十里至蠻等七十里至虎踞關又五十里至南喜三十里至等拐又十里天馬關此境內南行之里數也至於臨夷之路則有五——自騰北道四程至茶山界自騰西道八程至里麻界十程抵孟養境——自州南一程至南甸二程至干崖四程至蓋達蠻哈山十程由蠻暮至猛密二十七程至緬甸三千里有奇至南海——自騰南一程至南甸四程至隴川自隴川

西南又十程至猛密轉達緬自隴川東道又十程至木邦轉達景線卽古八百媳婦國——自騰東南道二程至蒲窩二程至芒市轉達鎮康舊謂古臨夷之路皆撫剿所必由惟茶山所往號野人境峭壁不可梯繩弱水難於舟筏而茶山里麻前明設有兩長官司明季時爲野人所驅奔入內地今尙有早土司後裔已爲齊民其地閉塞不通久矣古勇明光滇灘諸隘之設防野夷也至於阿瓦之道出銅壁鐵壁虎踞三關皆可乘船赴緬惟猛卯出天馬關陸道多於水道前用兵時密探其路自天馬關五十里而小濫又五十里而蔓布三十里而猛卡四十里而蠻

空四十五里而猛老四十里而猛勒四十五里而蠻黑六十里而猛密土司三十里而不亞七十里而章谷洞三十里而尼孤凡五百九十五里然後下船兩日卽抵阿瓦歷彥得上漿謬直埂至阿瓦約三百里計天馬關至阿瓦水陸兼行不過九百里耳而明將軍征緬由木邦出天生橋取宋寨其地散漫小徑叢出深入無繼必至潰敗傳經略由萬勿關四十里歷猛弄蠻理止丹來戛南蓋河又三十里出戛鳩渡江十里蠻乃三十里蠻赧又三十里麻里而至猛拱百五十里南烏賴三十五里沙河三十里深溝又六十里而至孟養其地至阿瓦甚遠且路徑不

熟炎天瘴盛因回師而駐老官屯其路則出鐵壁關五十里而至猛卡又五十里而至楞木又十里而至洗怕河歷猛允猛暎而至新街趙宏榜所敗績處也南行卽爲老官屯臨大金沙江賊分扼江之東西我軍逼其東寨而駐故有造船之議謂元人征緬以此取勝也要在熟悉地勢多集兵力出其不意耳緬人善於操舟舟之頭尾多置西洋大礮施轉如飛趙宏榜新街之敗爲其所擊而潰卽是礮也又提督常青言三十四年駐兵江岸時月夜見江中現出象隻象背載數十人逆流起伏甚捷水中用象載戰兵古所未聞并志之以示知兵者備焉然唐時通

天竺亦取道於騰越蓋有兩道焉一自諸葛城南行二百里至樂城入驃國境卽今緬國也經萬公等八部落至悉利城七百里又經突旻城至驃國千里自驃西度黑山至中天竺迦摩波國千六百里又西北渡迦羅都河至奔那伐檀那國六百里又西南至中天竺東境恆河南岸錫朱噶羅國四百里又西至摩錫佗國六百里此則自騰越而南由緬甸城轉西以至東天竺界凡三千五百里至中天竺一千六百里共五千一百里也自諸葛城西去騰充城二百里又西至彌城百里又西過山二百里至麗水城乃西漢麗水龍泉水二百里至安西城乃西渡彌

諾江水千里至大秦婆羅門國又西渡大嶺二百里至東天竺北界箇沒盧國又西南千二百里至中天竺東北界之奔那伐檀那國與驃國往婆羅門路合此則自騰越而西由麗江進藏地至東天竺國北界二千里又千二百里至中天竺僅三千二百里視南道徑一千九百里也然則騰越正與天竺相對中間爲赤髮野人所隔迂道南行千七百里至緬甸然後轉而西至東天竺又西北至檀那計二千八百里迂道西行然後轉南亦至檀那計三千二百里若使驅逐赤髮野人開通直路自騰越達天竺不過千八九百里昔漢武欲通西南夷拓梁州之境徑

接大夏豈不偉哉

入邊各路

自永昌過蒲縹將至怒江有屋牀山乃百夷界限也高山夾箐地險路狹馬不能並行過是山三里許卽怒江沿江數十里上高黎共山路亦頗險上二十里下一陡澗又上三十里至山頂夷人立柵爲砦過砦又下四十里許平地乃麓川江上流過此則無險隘之地矣一路从怒江西上二日程至騰衝府七日許到麓川一路自白崖過景東从木通甸至灣甸渡河入茫施約十日程到麓川又一路自怒江上流蒙來渡至景線沿河小渡

十數處皆一八境也

方輿紀要

雲南與貴州四川接壤今行旅所經有東西兩路而皆以曲靖爲孔道從辰沅經貴州出威清平壩普定安南越普安州入雲南界遵平夷而達曲靖者此東路也從巴夔經瀘州出永甯赤水畢節過昭通踰七星關入雲南界遵霑益而達曲靖者此西路也志云雲南之門戶有四曰古路曰西路曰東路曰間路自邛雅建昌會川涉金沙江入姚安白崖者古路也秦常頰略五尺道至蜀諸葛武侯始大闢之謂之西道亦曰石門道唐書韋

泉傳石門者隋史萬歲南征所開也天寶中鮮于仲通下兵南

溪今四川敘州府道遂閉至是蠻經北谷近吐蕃皋復治之由黎州出

邛部置青溪關遣幕府崔佐時從此通南詔又蜀王建時由此

擊雲南俘斬數萬自宋以后此道又閉元季始置郵傳于此東

路則肇自莊躋而立驛則自明初始若由重慶綦江七驛至遵

義又六驛至貴州所謂間道也諸葛武侯遣李恢關宗分道南

征又馬忠撫定牂柯皆由此此四路者王黔蜀而言也若從廣

南而入雲南有二道皆會于宜良萬曆三十二年普湖驛丞李仲登請開廣西路以便雲南

其略曰雲南富州與廣西賓州接界僅隔一日欲開水路則從宜良路南彌勒維摩至下江從舟過富州計程不過五日往時

有石城驛回部驛維摩驛河母驛今皆荒廢欲開陸路則從宜

良師宗塊卜古彰陽達計程八日至泗城州過田州約二十日

中問平川坦道傍三岔江入京師不過七十四站水陸通計較

近二十餘站惟普鮮驚埂馬科古彰夜得板羊河澤等村設驛

四站土壤饒沃道從安南入雲南亦有二道皆會于蒙自永樂

路易通後不果安南分軍出雲南蒙自是也羅氏曰蒙自縣經蓮花灘入交州

百隴關循姚江右岸者此大道也自蒙自縣河陽隘入交州循

姚江左岸者皆山其餘蹊徑岐途不可更僕數矣楊氏曰昔諸

葛武侯入南中分軍一出牂柯今四川遵義府一向益州今南

南皆古益州郡也而躬率步騎渡瀘入越巂今四川建昌行都司入姚

蠻自越巂馬湖青蛉自是有事南中者未嘗不師武侯之成法

也唐天寶九年鮮于仲通伐南詔統大軍出南溪路今四川敘州府分

遣越嶲軍出會同路建昌行都司安南軍出步頭路步頭今臨安府十三年

李宓伐雲南亦分二道宓自蜀入宓時為劍南留后侍御史廣南節度使何

履光督軍自海道入又貞元五年異牟尋謀歸分遣信使由西

所謂海道也宋寶祐初蒙古攻大理次忒列在吐番境內分軍一從西道

入日晏當路在今麗江府徼外一從東道人路由白蠻即今姚安太弟將勁

騎從中道入從越嶲渡金沙江至北勝州此中道也元至順初遣徹里帖木兒擊

雲南叛者時雲南諸夷禿堅等為變亦分軍一自四川進一由八番進今貴州也又

至正二十四年明玉珍攻雲南分兵三路一由界首入在敘州府一

由建昌入一由八番入洪武十四年傅友德等帥師討雲南分

軍出四川永甯趣烏撒而大兵自辰沅出貴州向曲靖即本朝

定雲南平吳逆亦三道並進此從來攻取之大勢也

南控交趾

自廣南廣西臨安元江以至車里老撾二宣慰司之南皆安南

國地

西擁諸甸

自永昌以西皆蠻甸環立為邊徼外藩

北距吐番

麗江永北皆與吐番接界今西番諸夷是也明初既平雲南裂

吐番二十三支分屬沿邊郡邑轄以土官于是控制在我侵叛絕少蓋得制番之上策矣

師範曰明正統間靖遠伯王驥南征會議開金沙江未果嘉靖初巡撫黃衷仍踵此議工役垂興爲土官鳳朝明所梗會黃衷去事遂寢後巡撫汪文盛委官查看朝明妻瞿氏阻之亦不行巡按毛鳳韶知其事銳意開導而人多附和其說謂池東道自雲南海口至安甯羅次富民只舊你革達吉普渡河安革法干土色江邊阿納木姑十三程惟土色有疊水池西道自雲南陸路至富民武定虛仁環洲至金沙江巡檢司

凡五程水路下船至罵刺母白馬口燦刺則五曲革直勒則卓刺除魯圭甯鈔答甸沙吉撒麻村土色大阿納木姑十四程則卓沙吉有疊水者武定府丞某也謂金沙江上自麗江永北姚安武定下至東川烏蒙芒部宏治正德間馬湖安監生於上江放杉板嘉靖十七年王萬安亦放杉板俱係拖稍大船建昌行都司奉欽取大木甯番越嶺鹽井建昌等五衛俱在上江打沖河三江口並德昌千戶所或劄箚或散放會川衛在下江科州採斫開江船行魯開虎跳灘天生橋十分不爲險阻者金沙巡檢李朝宣也謂自巡檢司西過江五十

里界會川衛每見客人販木劄木簾筏江流六晝夜卽抵馬湖隨簾下船或一二十載糧食養豬畜跳簾擲船如履平地江下五十六里有大小虎跳灘冬夏水落可施開鑿者姜驛丞梁松也謂自德昌所洗迷村伐木下江頭一程至白水一程至會川衛甸沙關一程至梅易所三程至和曲州金沙江馬湖建昌客採大小板枋俱自德昌下河從金沙江巡檢司經過直至馬湖敘州因畫圖以進者建昌木客何松也鳳韶旣得諸人之懇懇以爲迤東極徑便但聞江內有巒尖石兩邊巖石生合成橋水從石縫流未委虛的若迤西水面洪濶

四時橫流客商通販前後不絕中間雖有虎跳二灘然皆沙石易鑿此則斷然可通無疑因請行總司會布都二司計議開通不獨利於一時一方實國家久安長治至計會地方多事議竟不行然所論迤東迤西道分難易其說亦疏繆蓋迤西江行亦經陰溝洞天生橋未有他道可以軼出也隆慶初鳳酋誅滅巡撫陳用賓復爲題請而議者多甲乙之詞大抵謂江道一通則商賈競舟憚陸算縉之利告竭於程番之入府而九驛之途鞠爲茂草矣至天啓中安酋倡亂貴陽道阻頗議開之按察使莊祖誥謂自巡檢司開由白馬口歷祿勸

之普隆紅巖石刺鮮至廣翅塘其下有三灘水溢沒石乃可
放舟涸則躋岸纜空舟以行歷會理川之直勒村罵刺土色
下有雞心石如堆三疊江中舟者相水勢緩急可行又歷東
川之踏照亂得頭峽刺鮮至粉壁灘甚駛又歷巧家之驛馬
河新灘至虎跳陰溝洞虎跳湍瀉陡石不可容舟陰溝二山
頽集水行山腹從陸路過灘易舟而下歷蠻夷司之大小流
灘烏蒙之黃郎鋪貴溪寨業灘至南江口始安流自廣翅塘
至南江水商行可十日乃經馬湖之文溪鐵索江邊數灘歷
麻柳灣教化巖又歷洩灘蓮花三灘會溪石角灘直抵敘州

城下說甚明晰然此時明運將終救敗不暇所議竟托空言
康熙間楚雄守馮魁亦綜此議迨乾隆五年憲府決計開之
祿勸而上萬難施工卽東川境內自蜈蚣嶺飛雲渡藤橋濫
田壩小溜筒五灘阻絕乃越東川於昭通界內開闢阨塞費
金不貲復阻於異石象鼻柯郎虎口諸灘之險旋復棄去乃
從永善之黃草坪施功自是順流達敘府然中經鍋圈洞旋
圈似鍋瀑流千尺泝舟者必挽箱而上嘗思益州記云瀘江
自朱提至犍道有黑水羊官三津之阻行者苦之乃謠曰檣
溪頰木盤蛇七曲盤羊烏龍氣與天通烏龍卽今烏蒙雪山

則三津七曲諸名即今諸灘險耳茲特繪圖于前並集諸說
 于後使從事者知所據焉按昆明孫髯曾作金沙江行上慶
 張雨制府 乾隆天子神禹王卑躬菲食垂衣裳川澤溝洫
 無壅塞金沙首議開南荒誰其議者西林相偉略奇才天下
 望乘槎有客到銀河解纜何難穿翠嶂 帝曰輔臣慎為之
 務使江流永無恙上公世襲一等承恩公慶復 銜 命出三台大開制
 府諮羣材韓侯昭通游戎杰 鼓舟銳而往三月果至西川回按圖
 索形如指掌高者過山低過巖西出犁牛東馬湖孫視瞿塘
 兒漢廣碧烟夾岸樹連蜷赤日逐波金洗潑虎豹磨牙伺客

過鼉鼉吹浪窺人往天險常湮草莽間月明空抱揚舸想安
 奢構覺滇道絕曾公高師扼其吭當時蚤從參議議豈使長
 蛇吞巨象 國家車書大一統王道平平路蕩蕩形勢從來
 須接引治水尤先於則壤那有土酋復梗化况是梁山敢崛
 疆誓將金鎖鎖支祁不用丹書驅魍魎上公奏帝帝曰俞勅
 宋陳韓諸臣俱効力江干人徧集篙師供指畫不惜 國帑勤諏
 諮廣甯少保張制府允隨 董厥事輪蹄雜遘江之隅開江定議庚
 由始盤古操鎚渾沌啟八十三潭潭水清億千萬年老蛟徒
 苟求其故功易奏行所無事平如砥萬事有成必有創庸人

往往或於是豈少勞撓中怯者惟在精思獨斷耳山川開闢
各有時鬼神呵護焉能私瀆銅蜀米互交易我 皇神聖天
爲之是庚申之役已經報竣或謂爲雷雨所壞勦事者獲戾
賠帑夫陸以行車水以行舟自然之道也非常之功必待非
常之人果衆志成城自百靈効順天豈真斬此而不使爲民
利乎嘉慶丙寅鎖印後三日

